

1905

ՄԺՂՈՒԿԸ

ՄԱՄԻՆ-ՍԻՔԻՐՅԱԿ

1

— Ոչ ոք չտեսավ, թե ինչպես ծնվեց փոքրիկ մժղուկը: Գարնան մի արև օր էր: Աչքը բաց արավ, նայեց շորս կողմը ու կանչեց.

— Ի՛նչ լավ է:

Մին էլ ոտիկներն իրար քսեց ու թռավ: Թռչում է և ուրախանում ամեն բանով: Իսկ ներքևում խոտը կանաչին է տալի, և խոտի մեջ թաքնված մի կակաչ ժպտում է ու ժպտում:

— Ինձ մոտ արի, մժեղ,— կանչում է ծաղիկը:

Մժղուկը իջավ ծաղկի վրա, ծծեց նրա հյութն ու ասավ.

— Ի՛նչ լավ է, և էս բոլորն իմն է:

Բայց դեռ խոսքը բերանումն էր, որ բռնացնելով եկավ բրդոտ բոռը:

— Բը՛ռո... էդ ո՞վ է նստել իմ ծաղկի վրա, բը՛ռո... ո՞վ է խմում իմ քաղցր հյութը, բը՛ռո... Դե՛նը կորի, անպիտան մըժղուկ:

— Սպասի՛, է՞ս ինչ բան է,— տգտզաց մժղուկը,— չէ՞ որ էս բոլորն իմն է:

— Բը՛ռո... չէ՛, իմն է:

2

Մժղուկը ոտները զոռով ազատեց կատաղի բոռից: Նստեց խոտի վրա, լիզում էր ծաղկի հյութով թաթախված ոտիկները

ու բարկացած խոսում.

— Ի՛նչ կոպիտ է էդ բռուը, չէ՞ որ էդ բոլորն իմն է, արևն էլ, խո՛տն էլ, ծաղի՛կն էլ:

— Ո՛չ, ներեցեք, ի՛մն է,— խոսեց բրդոտ ճիճուն, որ բարձրանում էր խոտի ցողունի վրա:

Մժղուկը գլխի ընկավ, որ ճիճուն թռչել չգիտե, համարձակ ձայնը բարձրացրեց:

— Ներողութ՛յո՛ւն, բարեկամ, սխալվում ես, բոլորն իմն է, բայց ես հո՛ չե՛մ արգելում քեզ:

— Լա՛վ, լա՛վ, մտի՛կ արա, որ իմ խոտին չդիպչես. ձեզանից էստեղ էնքան թռչում են որ... Դուք թեթևամիտ ժողովուրդ եք, իսկ ես ծանր ճիճու: Դե՛, հայդե՛, գնաս բարով:

3

Մժղուկը թողեց ու թռավ հեռու, տեսավ ջուր:

— էս հո իմն է ու իմը, իմ ջուրը: Ա՛խ, ի՛նչ լավն է. էստեղ խոտ էլ կա, ծաղիկ էլ կա:

Եվ ահա թռչում գալիս են ուրիշ մժղուկներ էլ:

— Բարի օր, քո՛ւրիկ:

— Աստծու բարին ձեզ, քո՛ւրիկներ: էդ ո՞ւր եք թռչում:

— Խաղ ենք անում, դու էլ արի մեզ հետ: էնպես ուրախանո՛ւմ ենք:

Ու գնացին: Խաղում էին ջրի վրա, պտտվում ու թռչկոտում: Հանկարծ, պը՛ժժ, ոնց որ մինը մի քար գցի, ճնճղուկն ընկավ մժեղների մեջ:

— Վա՛յ, վա՛յ,— ժվժվացին բոլորն ու ցրվեցին դես ու դեն:

Մին էլ երբ ուշքի եկան, տեսան շատերն էին պակասել:

— Ա՛խ, անպիտան,— հայհոյում էին ծեր մժեղները,— ամբողջ տասը հոգի փչացրեց:

— Վա՛հ, ամբողջ տա՛սը հոգի, էս հո բռուից էլ անց կացավ:

Մեր մժղուկի սիրտն ահ ընկավ, ու մյուս նորելուկների հետ միասին մտավ ճահճի խոտերի արանքը, տապ արավ:

Բայց էստեղ էլ ուրիշ փորձանք: Երեք մժղուկի ձուկը կերավ, երկուսին էլ գորտը տարավ:

— Էսպես էլ բա՛ն կլինի...— զարմացած մնացել էր մեր մժղուկը:— Մի՞թե կարելի է ապրել էսպես:

Գիշերն ընկավ, մութը վրա հասավ, ու բոլոր մժղուկները մտան եղեգնուտի տաք տեղերը, թաք կացան:

Վերև երկինքը լցվեց աստղերով, լուսինն էլ ծագեց, ու միասին ցոլացին ջրի մեջ:

էնպես սիրո՞ւն էր:

— Ա՛խ, իմ լուսնյա՛կը, իմ աստղերը...— շնչում էր մժղուկը, բայց ահից էնպես կամաց էր շնչում, որ ոչ ոք չլսի:

— Ա՛խ, իմ աստղե՛րը...— շնչաց կամաց ու քնեց: